

Paulo Ena Malele **TITO** Kevanai

Puka Laloana Ielena Luvana

Tito 'eva sia Iuda kauna. 'A ia elalo'udai laloanai, Paulo eduluia ena veauneke vinalana laloanai. Paulo eta'u Tito 'eva Kelete motumotunai evikania, ia betata'u abiveni kauta ika'inita vinalana bevavaia 'abu kanaua'i.

Malele kanania laloanai, luva lava'ana'ina davana kanania. Keleta kauta eta koakoa 'eva sia denama'ina kave'i (1.10 - 13). Paulo ediaka, abiveni kauta i'ana'iavaita vinalana iulavenina kauna ena koakoa 'eva benama'ina kave'i. Mai kau ivaikabasita dalana Tito e'ouia, vitaitana moluane mai ateate 'alu'aluta mai da'ala abi kauta. Malele to'onai 'eva Paulo eta'u Tito e'ouia moluane mai ateate bevaikabasita nuata bevaka'onamo. Ia ka ka kevatai vinala mediata bevavai mai kau vaidai kevatai. Ia 'eva badu luvata sia beluluva mai kau vaidai ita sia bevina.

Puka Iduvuna Namata

- a. Lova aku. (1.1 - 4)
- b. Dilava ena lo'e vinala kauta. (1.5 - 16)
- c. Abiveni kauta eta mau'i. (2.1 - 15)
- d. Vasiyasi luvata. (3.1 - 11)
- e. Luva to'ota. (3.12 - 15)

Vanama'ina Luvana.

¹ Lau Paulo, Dilava ena da'alabi mai Iesu Keliso ena veauneke kau'u. Lau 'eva desini'u kau Dilava edilata kauta kataua eta abiveni badulata Dilava ena luva umauna beikabasia kanaua'i Dilava 'olana be'aku.

² Abiveni mai aoneka kanaua'i mauli keinikeini benuabata vaia, Dilava 'ani siako kanobata asido'o epulu laloanai mauli kanania eluva'ana'i vaia, ia 'eva sia ededede.

³ 'Ani elalo vaia makava vakaia ena melala umaunai valina nama'ina evala'asia kau boutai beikabasia, valina kanaua ailolo vaia, Dilava ivamaulita kauna evamomo'ai'u ia ena vinaula kanania ivavainai.

⁴ Tito, naku'u umauna eta abiveni ka'onamo laloanai, lau oni alele venimu. Dilava ita kamata mai Keliso Iesu ita ivamaulita kauna iulaveni koana mai nua'elu bevenimu.

Tito Keleteai Kau Namata Edilata.

⁵ Kelete ai avikanimu 'olana 'eva vinaula boutai sia deole vinaulata bovavaita kave'i inoku vanua boutai laloatai Dilava ena lo'eai kau namata bodilata 'ana'ia vai vinaulana bevavaia, ikabasi avanimu ikabasinai bovinula.

⁶ 'Ana'iavai kauna 'eva va'evai vuvua sia devakoala kauna, adana ka'onamo, nakuna beabiveni maivaka lele be'ika, sia bebika'a.

⁷ 'Olana Dilava ena vinaula eikakao kauna 'eva va'evai vuvua sia devakoala, sibona ena ulai sia bedada'a, 'o sia bebadu molaumolau, sia beinu ba, sia beaivala mai moni sia beula venia vaika.

⁸ Ia Da'a'au kauta beabita dae ena lumai mai dava nama'ina davana belalo'au venia, lalovai komoloai bemimia, komolo dalana bemauli, ena mauli beveveni Dilava kevanai, mai nuana bekabukabu.

⁹ Dilava ena luva umauna devaikabasi vaia vaikabasina kanaua beabi 'inia. Dala kanania'i vaikabasi umauna bevaikabasita kau nuata bevakula'ilata, mai vaikabasi umauna devaivivia kauta kataua eta va'eva bevakomolota.

*Vaikabasi Kauta Dedeta
Oi Bo'outa Lele Bevuvunu.*

¹⁰ 'Olana vaivivi kauta doutamo ua'i eta luva 'avaea luva 'avaeai kau delebata, maivaka deivata kauta kataua doutamo vaka ua'i.

¹¹ Kau kataua oi bo'outa lele bevuvunu nututa be'alavu, 'olana abiveni kauta eta luma kauta doutamo nuata devabavunuta, sia bemavaik-abasi davata devaikabasivai moni ilalovainai malalai vinaulata kataua devavai.

¹² Kelete kauta eta enolea kauna umauna eta'u ka Kelete kauta e'outa ediaka, "Kelete kauta 'eva dede kauta, boloma 'asita si'avata vaika boita, debalea sibota bo'ata anita mo delalovaita."

¹³ Nia 'eva luva umauna eluvala, kanaua 'ounai bo'ovenita si'asi'a, inoku eta koakoa bekomolo Dilava beabivenia kula'ila.

¹⁴ Inoku Iuda kauta eta sisiba 'ana'ita mai kau kataua eta talavatu luvata 'uluta sia be'ika, kataua 'eva kau etai de'asi Dilava ena luva umauna devai-vivia.

¹⁵ Nuata nama'ita kauta kataua 'eva kevatai dava boutai dekomolo kave'i, ia nuata si'avanai devonu kauta kataua mai sia deabiveni kauta 'eva kevatai sia dava ka ekomolo. Eta lalovai mai nuata umauta 'eva desi'avana.

¹⁶ Ia dediaka Dilava deikabasia kave'i, beia eta koakoa ai 'eva Dilava sia deabia dae. Ia 'eva kau kataua ulata sia e'ula, lele sia de'ika kauta mai dava nama'ina ka sibota kevatai bevavaia 'eva sia bedaia.

2

*Abiveni Komolona Umauna
Bevaikabasita.*

¹ Beia oni 'eva abiveni komolona umauna bo-vaikabasita dala kanaua'i bemaui.

² Kau namata bovaikabasita bevapasisi, eta koakoai kau ia 'olata be'aku, lalovai komoloai be-mauli mai eta abiveni bekula'ila kave'i, lalo'auai mai vapasisiai.

³ Dala vitaitanaimo 'a'ate namata bovaikabasita Dilava ena ula maulinai bemimia, vaida kevatai sia be'ou keinikeini, 'o sia beinu ba, ia vinaula nama'ina dalata vaida bevaikabasi vaita.

⁴ Inoku ia betata'u 'a'ate 'alu'aluta bevamaleleta sibota adata mai nakuta belalo'au venita,

⁵ belalovai komolo mai benama'ina kave'i, eta luma vinaulatamo bevavai, koakoa nama'ita bevavai, mai adata daitai bedadai, inoku kau ka Dilava ena luva sia bevasi'avanala.

⁶ Dala vitaitanaimo, kau 'alu'aluta boyakula'ilata nua komoloai bemaui.

⁷ Oni 'eva dava boutai laloatai ikaika nama'ina bovaikata emu koa nama'itai. Emu vaikabasi laloatai 'eva koakoa komolonai mai nuamu umaunai bovaikabasi.

⁸ Luva komolona umaunai boluvaluva inoku sia kau ka emu luva bevavaia si'asi'a. Inoku oni devaivivimu kauta kataua bemalalai 'olana etai luva si'avana vaika beluvala 'abuna asi'i.

⁹ Da'alabi kauta bovaikabasita dava boutai laloatai eta 'ola kauta leleta be'ika, nuata bevanama'inata mai eta luva tavata sia bevamueta.

¹⁰ Eta 'ola kauta kevatai sia bevinao beia dala boutai laloatai 'eva eta nama'ina mai lele ika koana bevala'asia, kanaua'i kau Dilava ita ivamaulita Dilavana ikabasina beula venia kula'ila.

*Keliso Ena Mue 'Udai Melalana
Ka'imala Laloanai.*

¹¹ Koakoa kataua boitai ekamia, 'olana Dilava ena iulaveni koana kanaua kau boutai beva-maulita iulavenina koana 'ani evala'asia.

¹² Iulaveni koana kanaua ita evaikabasita Dilava ivasi'avanana maulinai sia ekamauli mai kanobata iula venina vinaulata si'avata vaika sia ekavavai, beia vapasisiai mai komoloai ekamia, mai Dilava ena ula maulina ekamauli vaia kanobata kanania laloanai.

¹³ Ita kanaua ekamia koma mai eta nuabata namana 'eva eta Dilava namana mai ivamaulita kauna Iesu Keliso ena mue 'udai melalana nuavina ka'imala laloanai.

¹⁴ Keliso sibona ena mauli eveni ita daitai inoku tavata eveni koa si'avata boutai laloatai eluvuta mai si'avana asi'i kautai evaota ia sibona ena umauta, kau ita nuata umautai ka'ula melala boutai nama'ina vinaulata mo ekavavai.

¹⁵ Luva katania bovaikabasivai mai kau bovakula'ilata, maivaka eta mauliai dava desi'avana davatai maikula'ilamu bounai bovakomolota. Kau ka sia boikala vadai melo kikumuai beva aomu.

3

Abiveni Kauta Beva'olu Vinaula Nama'ita Ivavaitai.

¹ Abiveni kauta bovalalotaune Kavamani kauta mai 'ola kauta eta siavu venutai bemimia, leleta daitai bedadai maivaka beva'olu vinaula nama'ita ivavaitai.

² Bo'outa kau ka kevanai sia beluva si'asi'a, nua'eluai bemimia, bemanau, mai koakoa nama'ita kau boutai kevatai bevavai.

³ 'Ana'inai ita vaka kabo'o, lele sia kaika, debata kava'eva, mai kauani ena ula vinaulata si'ava vaikata da'alata kabi kalalonama vaita. Mai eta mauli laloatai si'avana vinaulata kavavai mai kamama, kau vaida devaivivita, mai ita ka ka vaka sibota kavaivivita.

⁴ Beia Dilava ita ivamaulita kauna ena koakoa nama'ina mai ena lalo'au dela'asi koanai,

⁵ ita evamaulita. Kanaua 'eva sia ita eta vinaula komolo 'ounai, beia ia sibona ena vilalo koanai evamaulita. Idume Kabukabunai evaidi'uta kapulu 'udai kau makamakatai kao evamaulita.

⁶ Dilava eta'u ena ainamai Idume Kabukabuna akatai esisia ivamaulita kauna Iesu Keliso dainai.

⁷ Kanaua 'ounai Dilava ena iulaveni koanai komolo evenita ia vailanai, inoku ita mauli keinikeini nuabatana kanuabata vaia maulina ekabia.

⁸ Vaikabasi kanania 'eva luva umauna, inoku lau a'ula oni boluva kula'ila vaia kau 'eva dava katania beikabasi. Inoku kau kataua Dilava deabivenia kauta 'eva be'imata kave'i vinaula nama'ita bevavai eta mauli laloatai. Katania 'eva dava nama'ita kau boutai beduluta.

*Koakoa Si'avata Vaika
Kevatai Boda'atau.*

⁹ Beia bo'o vialata, mai kubukama sisibata, mai Mose ena talavatu 'ounai devina 'o deviaaku kauta kevatai boda'atau. Dava kataua 'eva anita asi'i mai kau ka sia bedulua.

¹⁰ Viloa ivavaina evapuluta kauna melala makavana mai ivaluana bovoidibala, kanaua mulinai 'eva bovikania 'avaea bevala'asia.

¹¹ Oni boikabasi kau kataua boita 'eva dala umauna devikania mai ia 'eva si'avana kauta, sibota eta si'avana detata'u devamomo'aita ia 'eva deva'eva.

*Paulo Ena Ula Luvana Mai
Vanama'ina Luvana To'ona.*

¹² Inoku lau Aletema 'o Tukiko basinia bevasi kevamu 'abumu beabia koanai, dala bokakavu boasi kaokao keva'u ua'i Nikapoli ai, 'olana

lau nua'u 'ani avavaia kave'i ua'i bamimia 'elu melalana kanania laloanai.

¹³ Sena talavatu kauna mai Apolo ita boduluta eta kalima dalana bovavaia kave'i inoku ia dava boutai deula venita davata be'abi.

¹⁴ Eta kau ikabasi beabia eta maulai vinaula nama'ita bevavai vakaia kau kataua dava deula venita kauta beduluta. Inoku asi'i demamia 'avaea eta mauli sia maivuata dema ao.

¹⁵ Kau nia'i keva'uai kauta boutai eta vanama'ina luvata desisini kevamu. Emai vanama'ina luvata eta kau boutai abiveni laloanai delalo'au venimai kauta kataua bovenita.

Ameamea Dilava ena iulaveni koana boumuiai kevamuiai bemimia.

Luva'ana'i Namana Makamakana
The New Testament in the Nara language of Papua
New Guinea
Nupela Testamen long tokples Nara long Niugini

copyright © 2024 Global Bible Translators

Language: Nara (Lala)

Dialect: Nara

Translation by: GBT

Contributor: SIL Papua New Guinea and Namseul Presbyterian Church in South Korea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-08-29

PDF generated using Haiola and XeLaTeX on 3 Sep 2024 from source files dated 29 Aug 2024

f0f11a93-ea2f-5af2-b48b-3653b522a3fb